

“
Tin tantu
kos pa hasi i
asina tiki kos
hasí ...
BONERIANO

INVESTIGASHON LÈKMENTU DI INFORMASHON

Eksitoso klínika di basketbòl



Federashon di Basketbòl di Boneiru, en koperashon ku Bònt di Basketbòl Hulandes i INDEBON, a konkluí ku éksito un wikènt di klínika intensivo di basketbòl, ku meta pa mehorá abilidad di entrenadó i stimulá kresementu di basketbòl na Boneiru. E evento a konta ku presensia di hopi entrenadó i hungadó entusiastá. E ophetivo prinsipal di e klínikanan akí, ta pa brindá formashon sertifiká na entrenadónan di basketbòl na Boneiru.

**MANTENE BO
VEHIKULO OF
EKIPO DEN
KONDISHON
KU PIESANAN
KUMPRA NA NAPA**



CHANGAN AUTO



CS55 PLUS

[f /dabboussimotors](#)

HUSTISIA



**No saka víktima di
aksidente for di outo**

PAG#6

xerox



**OBERSI
ELECTRONICS
BONAIRE**

**Live
FM 99**



**\$10 FREE
SLOT
PLAY**

Sign up for your **FREE** Player's Card
and receive \$10 in **FREE** Slot Play!

Open Monday - Saturday 9am to 4am | Sunday 7am to 3am | (599) 717-3504
diviflamingocasino.com | ATM available



Partisipashon di
Parokia di
La Birgen di Coromoto

Djasabra 9 mart
misa na ingles pa 6'or,
7.30 pm misa

Djadumingu 10 mart
misa 7'or i 10'or mainta
atardi 6' or.

Boneiru ta haña transporte públiko tòg?

KRALENDIJK

Na Boneiru tin djestres parada di bùs, pero no tin transporte públiko. P'esei spesialmente personanan ku tin un entrada abou, tin problema di bai di un sitio pa e otro i ta dependé di un kabe'i boto pagá serka personanan ku sí tin un outo.

Dick Drayer, den un publikashon di NOS, ta indiká segun un rapòrt resien despues di gastu di vivienda, gastu di transporte ta e parti di gastu mas grandi di famianan na Boneiru, Sint Eustatius i Saba. P'esei gobièrnu a disidí pa invertí e aña akí struktural 600 mil euro i despues 300 mil euro, pa lanta



un servisio di transporte públiko na Boneiru. Saba i Sint Eustatius ta haña kada un un 100 mil euro.

Si ta bùsnan ta bai kore di bèrdar tambe, esei ta di mira. For di 2010, na momento ku Boneiru a sali for di Antia i bira un munisipio spesial Hulandes, a bini inisiativanan for

di Gobièrnu Hulandes pa establese transporte públiko. E paradanan di bùs ta testigu di esei. Pero un servisio di bùs, no a kristalisá nunca, pasobra no a tene kuenta ku e sektor di transporte lokal. Esei ta dediká su mes spesialmente riba e parti di transporte kaminda por gana sèn, turistanan

krusero.

Kabe'i boto

Shirley Cicilia ta biba den e bario di Rincon, un binti kilometer nortwèst di e kapital Kralendijk. E mester bai su trabou na Playa, manera Bonerianonan ta yama Kralendijk. E ta lanta tur dia 4'or di mardugá pe ta pará komo promé hende na e parada di bùs. Einan un bùs ku tin lugá pa apenas sinku hende, ta busk'é.

“Mi ta paga 3 dòler pa e kabe'i boto aki, tin biá 4. I ora mi bai kas bèk anochi, mi ta regla transporte via via i mester paga tin biá 10 dòler.” Ku su suèldu mínimo di 1600 dòler, Cicilia ta paga 200 dòler pa luna na e servisio di kabe'i boto klandestino akí.

Regla pa transporte di persona pa bùs i taksi, ta poné den lei mas ku sesenta aña pasá. Tin 35 asina yamá pèmit pa AB pa transporte públiko. Ounke e ordenansanan ta spesifiká ku bùsnan chikí mester ofresé servisio riba un trayekto indiká i bùsnan grandi mester kore segun un programa outorisá, práktika ta otro.

EshofùrnAB ta traha komo independiente. No tin reglanan legal pa oranan di kore i di sosiegu. Gobièrnu no ta supsidia transporte públiko i ta regulá su mes, ku tarifanan ku ta indiká a base di demanda i oferta. Sierto empresa i dunadónan di trabou, ta regla propio transporte pa nan trahadó.

Inisiativa frakasá

Orlando Franciska ta dirigí un di e empresanan di transporte. E ta kore spesialmente konvoinan grandi i a mira hopi

inisiativa pa transporte públiko frakasá. “Nos tur ta propio empresario,” Franciska ta bisa. “E situashon awor ta kestion di demanda i oferta. Un biahe pa Rincon ku nuebe pasahero, ta generá 50 dòler, pero un konvoi yen di pasahero krusero, ta generá 250 dòler. E eskoho ta fásil e ora ei.”

Franciska tin desena di bùs pará riba su tereno. “Si otronan ta bai supsidia pa transportá pasahero, nos ta pèrdè volúmen di benta,” e ta bisa. Sinembargo e tin hopi gana di partisipá den e proyekto nobo, ku Gobièrnu Hulandes ta bai finansiá. “Transporte ta den mi sanger. Sí e finansiamentu ta strukturá, mi por manda mi shofùrnai bai traha ku un programashon obligatorio. Bùs tin sufisiente.”

Tònnan for di Boneiru mes

Kolegio Ehekutivo di Boneiru ta hasi lantamentu di transporte públiko un prioridat. Mientrastantu a kuminsá ku un prueba kaba riba algun ruta. Boneiru ta invertí alrededor di 400 mil dòler den e proyekto riba e sèn ku Hulanda ta duna.

Helvig Thodé, kende ta trèk e trayekto di transporte públiko pa Gobièrnu, ta bisa ku ta masha importante pa e isla pa hasi transporte públiko pagabel. “Personanan ku no tin transporte públiko, spesialmente hendenan di edat avansá, ta keda isolá. Muchanan ta yega skol lat, personanan ta pèrdè nan sita ku dòkter, pasobra nan ta dependé di otro i esei bo no ke. Bo ke pa esei ta otro tòg e ora ei.”



Pronóstiko di tempu pa Boneiru

Pronóstiko di tempu pa Boneiru
Djaweps 07 te Djabièrnè 08 Mart 2024
Leve te parsialmente nublá i seku

Awe i mañan lo ta leve te parsialmente nublá i lo keda seku. E temperatura máksimo lo ta aproksimadamente 32°C, e temperatura mínimo mas o ménos 27°C. Bientu for di direkshon ost ta moderá te basta fuerte, forsa 4-5.

Altura di ola: 2.0-2.5 m (aproksimadamente 7 pia).
*** Altura di ola válido pa laman grandi**

INVESTIGASHON LÈKMENTU DI INFORMASHON

KALENDIJK – Reshèrshi di Reino ta bai investigá un posibel lèkmentu di informashon konfidensial. Sekretario di Estado di Relashon di Reino, Alexandra van Huffelen, a pidi Representante di Reino, Jan Helmond, pa hasi denunsia tokante e delito aki.

Indikashon di e informe ta ku djamars entre otro riba e wèpsait di Dossier Koninkrijksrelaties, a publiká ku Konseho di Minister a nombra e komisario di Gobièrnu, Alida Francis, komo Gezaghèber di Sint Eustatius. Tur ku ta enbolbí den un proseso di nombramentu asina, tin

un obligashon di mantené sekresia legal.

Esaki, a base di WolBES, ta konta tambe pa e miembronan di e komishon di konfiansa di e konsehonan insular na Karibe Hulandes.

E violashon di konfiabilidad, ta keda konsiderá komo un krímen, e buki di lei di

derecho penal BES ta indiká. Artíkulo 285 ta bisa tokante e grado di kastigu: “Esun ku dor i su funshon ku ta obligá pa warda sekreto i ku intenshonalmente saka sekreto, ta keda kastigá ku kastigu di prizòn di mas haltu seis luna, òf but di plaka di e di dos kategoria.”

Esaki ta mas suave ku na Hulanda, kaminda lèkmentu di nòmber di kandidato pa Burgemeester ta reglá. Investigashonnan di Reshèrshe di Reino poko biá ta kondusí na un sospechoso i sí algu pasa tòg, huesnan ta limitá nan mes hopi biá na un kastigu di trabou.

Konferensia tokante aserkamentu atministrativo di debilitashon

1 Mion pa aserkamentu atministrativo

KRALENDIJK -- Riba 27 i 28 di febrüari a tuma lugá e konferensia ‘Rumbo pa un fundeshi fuerte pa un aserkamentu efektivu’ na Boneiru riba e tema di aserkamentu atministrativo di debilitashon. E partisipantenan a indiká ku ta bon ku e paisnan outónomo i Hulanda Karibense ta buska kooperashon ku otro den

e parti karibense di Reino. Kriminalidat no ta stòp na e fronteranan insular i mester impedí ku aktividatnan kriminal ta move entre e islanan.

Siña di otro

E paisnan outónomo i Hulanda Karibense ta haña nan konfrontá ku tendensianan similar den kriminalidat i ta

desaroyá instrumentonan atministrativo similar pa kombati kriminalidat di debilitashon. P’esei nan ta mira e nesesidat tambe di kooperashon. Por siña hopi di otro. Ademá tin mester di kompromiso atministrativo kontinuo di parti di tur gobièrnu. Na yùni, durante e Konsulta Kuatropartit Hudisial, lo para ketu na e avansenan ku a logra.

Informashon Regional i Sentro di Ekspertisio Hulanda Karibense (RIEC CN)

E konferensia a surgi for di e grupo di trabou Aserkamentu atministrativo ku ta operá bou di e bandera di Konsulta Kuaterpartit Hudisial, den kua ta partisipá Aruba, Kòrsou, Sint Maarten, BZK i J&V. Aña pasá e Sentro Regional di Informashon i Ekspertisio (RIEC CN) a inisiá na Boneiru (wak: Openbaar Lichaam Bonaire: Convenant RIEC CN bekrachtigd (bonairegov.com), un aliansa di partnernan di siguridat pa tin mas bista kon kriminalidat organisá i di debilitashon na Hulanda Karibense ta manifestá su mes. E paisnan karibense

kier amplia nan ret i wak kon ta posibel pa kooperá ku RIEC CN i kon por interkambiá konosementu i ekspertisio. Pa e motibu akí a skohe pa Boneiru komo sitio pa e konferensia.

1 mion pa aserkamentu atministrativo

Den e kaso di aserkamentu atministrativo di debilitashon ta wak kon – banda di un aserkamentu penal – por hasi uso tambe di instrumentonan atministrativo pa prevení, siñalá i kombati posibel kriminalidat di debilitashon. Aki por pensa entre otro riba nenga òf revoká pèrmitnan di eksplotashon, screening ora di hasi kompra i destaho, seramentu di edifisionan òf intervení modifikando plannan di destinashon.

For di 2022 BZK ta pone 1 mion euro na disposishon di e paisnan karibense Aruba, Kòrsou i Sint Maarten pa inisiativa riba tereno di aserkamentu atministrativo. Pa regla esaki bon, a stipulá i

publiká un protokòl na 2023 den Staatscourant: Staatscourant 2023, 33574 | Overheid.nl > Officiële bekendmakingen (officielebekendmakingen.nl). Bista atras riba e programa di e konferensia

Durante e konferensia a diskutí entre otro e siguiente tópikonan: Historia di aserkamentu atministrativo na Hulanda Oropo i ‘best practices’ ku instrumentonan atministrativo. Kua proyekto e paisnan karibense ta ehekutando na e momentunan akí pa promové aserkamentu atministrativo. E método di RIEC CN. E plan pa asistensia hulandes pa atendé ku kriminalidat di debilitashon den e region latinoamerikano i karibense (LAC-regio). Lei Bibob, un instrumento ku kua gobièrnu por screen entre otro pèrmit-i transakshon di biennan inmóbil. Kolaborashon di Financial Intelligence Units den Reino komo ‘best practices’.

Partisipashon Seramentu di kaya



Pa motibu di plantamentu di mata den área di Oranjeplein, ta sera kaya parsialmente riba **djaluna 11 di mart 2024** for di **15:00 or** te ku **19:00 or**.

Ta sera un parti di Kaya Grandi: for di entrada di Kaya Grandi te na e krusada ku Kaya Isla Riba.

E área será ta alkansabel pa hende na pia. Parker bo outo pafó di e área será i **no** dilanti e barikada. Ta usa e kamindanan pafó di e área será pa kambio di ruta. Ta indiká esaki ku bòrchi di kambio di ruta.

Diskulpa pa e inkumbiniensia i danki pa bo kompreshon.


Gezaghebber
interino
R. Oleana

Sekretario Insular
mr. C.J.L. Frans



èxtra
...number 1

www.extraboneiru.com



Wowo di pueblo!

Ainda akshon di limpiesa den laman

KRALENDIJK- Ketu bai ta nota iniciativa di Stinapa i boluntarionan pa hasi akshon den limpiesa den laman na Lagun. E potrèt ta ilustrá esaki.



Siudadano balente:

Toyán Frans a limpia Pos Gurubu

KRALENDIJK - Toyán Frans, un siudadano balente a pone man na obra siman pasá i a limpia rònt di Pos Gurubu. Frans públikamente a mostra kon tira shushi sin niun klase di bèrgwensa òf remordimentu den naturalesa. Selibon a koperá ku un kòntainer na e sitio. Konsekuentemente Frans a hasi un yamada na komunidad pa dun'e un man i limpia e sitio. Apesar ku niun hende a presentá, Frans inkansabel a piki tur shushi den alredero di Pos Gurubu. Finalmente Frans a logra yena 2 kòntainer di shushi.



Sea transparente i informá komunidad

Pa: Robby Domacassé

KRALENDIJK -- Awor ku a sali for di konferensia di WolBES, sea transparente i bin informá bo komunidad, pa tin mas sabiduria i kompreshon di su balor signifikashon i kambionan di e struktura ku nos ta aden.

Man na obra, ban sigui enkurashá otro. Ban kambio nos mente pa nos bai dilanti. Ban saka e komunidad akí for di su zona konfortabel i mira e diferensia.

Nos mester bira sinbèrgwensa. Nos no mester tin bèrgwensa pa move den loke ku nos ta hasi pa bai dilanti. Pidi puntra i hasi.

Ban den bario, den komersio i den gobièrnu. Nos mester di ta mas positivo dor di enkurashá, motivá i sostené otro pa bai dilanti na lugá di kritiká i reklamá sin tin alternativa.

Esaki ta loke ku nos tur mester aportá kuné. Nos lidernan, intelektualnan i negoshantenan, mester krea den nos komunidad i negoshinan pa por motivá i enkurashá nos hendenan pa bai dilanti i ta parti di e desaroyo eksplosoivo ku tin aktualmente.

Nos lidernan i negoshantenan na lugá di reklamá i bisa ku nos no por nos, no ke, òf nos ta floho. Esaki mester bira bo aporte i mira e diferensia den e desaroyo akí. Eduká, motivá i enkurashá.

Komersiantenan mester buska un eksperto den rekursu humano pa por atendé ku nan empleadonan si bo no tin e abilidadnan akí. Ora ku lidernan i negoshantenan

ta kere ku nan ta mihó ku tur otro i no duna nan aporte den esaki i ta musta arogansia. Kòrda ku Dios ku ta vigilá i semper tin un ku ta mas mihó ku bo i bo kaida lo no ta leu.

Mester sostené nos hendenan lokal pa bai dilanti i bin ku un fondo di solidaridat mas pronto ku ta posibel pa invertí den nos hendenan pa rekobrá tur loke ku a bai pèrdí. Nos lidernan, polítikonan i komersiantenan lokal, a faya den e desaroyo ekonómiko eksplosoivo ku nos a konosé den e último añanan. Ku tur nan bon boluntad, sabiduria i ekspertisio ku nan tin, nan no a invertí i a yuda desaroyá e hendenan lokal pa tambe ta parti di bolo akí.

Dor di kambia e mente, dor di eduká, enkurashá i motivá, na lugá di bisa ku nos no por, nos no kier i ku nos ta floho.

Akinan nos naturalesa i su espesienan ta mas protehá i balorá ku nos hendenan den e komunidad akí. Den Tweede Kamer ta duna órden pa no desaroyá un área, pasobra tin dos pa tres para ta biba i brui eina. I ta menshoná ku nos Gobièrnu ta hiba un maneho deskabeyá ku dunamentu di pèrmit pa esakinan sosodé. Pero ta desaroyá henter otro parti di nos isla sin ta tene kuenta ku poblashon i e hende ku ta biba akinan. Ku su kustumber i moral i krea un sobre poblashon.

Mester bai na invertí mas lihé posibel den nos hendenan lokal su desaroyo personal i krea un mente di negoshi dor

di enkurashá i saka nos hendenan for di nan zona konfortabel pa tambe por bai dilanti den e desaroyo aki na Boneiru. Invertí den nan talento i trabou ku nan ehersé pa tambe por ta un negoshante chikí den turismo o otro áreanan.

Nos lidernan i komersiantenan ku ta bisa ku nos no ke, òf nos no por, ta un muestra di falta di liderazgo i ta nada mas ku individualnan ku poder, pero nada di sabiduria i un pensamentu i maneho positivo pa por duna korekshon i motivashon pa por tin bon personal ku ta bai dilanti i kontribuí den nan mes un negoshi, pa duna mihó servisio i tambe un mihó hende den komunidad

Pasobra hopi biá nan no tin tempu i ta traha pa nan mes bai dilanti i no pa yuda otro bai dilanti. E dia ku esaki sosodé, ku nos lidernan polítiko, invershonista, negoshante, komersiante i intelektual, duna nan aporte i kontribuí positivamente ku na sabiduria i ekspertisio na individual i organisashon den nos komunidad, nos lo mira un adelanto i éksito total den e desaroyo akí. Sino henter e desaroyo i integrashon akí ta nada mas ku un frakaso.

E ponensia akí no ta pa kritiká i kibra, ta pa nos pone man na obra pa mehorá e kosnan ku a bai robes den nos mes i pa kada un di nos kontribuí ku un granito pa mehorá nos hendenan den komunidad akí pa un adelanto positivo.

POLÍTICA

Tempu di aseptá sin mas a pasa

Boneiru a logra éksito na konferensia di trabou

KRALENDIJK -- Di 4 pa 6 di mart un delegashon di Boneiru tabata na Hulanda den kuadro di negosashon di kambio den WolBES i FinBES. A presentá di parti di Boneiru dos lista. Un lista huntu ku e tres islanan Boneiru, St. Eustatius i Saba, huntu i un lista ku diferente punto di Boneiru so. E lista di e tres islanan tabatin 17 punto. Di e 17 puntonan akí, a aseptá 14 kompletamente, dos a yega na un kompromiso i un mester keda konsiderá mas profundo di parti di Raad van State. E lista di Boneiru so tabata konsistí di un total di 13 punto, di kua 11 a keda aseptá kompletamente, un a yega na un kompromiso i tin un ku mester keda konsiderá mas profundo di parti di Raad van State. Ku otro palabra, un éksito di 83% pa Boneiru i 93% pa tur e islanan huntu.

Perspektiva

M21 ta amplia riba e logronan. Aparte di e éksito menshoná, ta bon pa pone e resultado akí den e konteksto, o sea perspektiva korekto. E kambio di WolBES i FinBES akí, ta den tapara pa mas ku 3 aña kaba. Kolegio Ehekutivo anterior no a hasi kaso i den pitu a kore manda un karta kaminda nan kier a bai di akuerdo ku

meramente tres punto ku tabata kambio di e kantidat di miembro di Konseho Insular, kambio di e kantidat di Diputado i anulá e funshon di Representante di Reino. Esaki tabata sin konosementu di Konseho Insular, pa no papia mes di konosementu di pueblo. Ta te ora ku Hulanda kier a trese un konklushon na e proseso i a envolví Konseho Insular den esaki, ku Konseho Insular a bin haña sa di un karta ku a manda ku deseonan di Kolegio Ehekutivo anterior. Akinan Konseho Insular aktual a para e proseso i a entregá un petishon pa nan duna nan aporte komo representante di pueblo. Asina a yega kaminda ta awor aki.

Porfin a duna representantenan di pueblo oportunidat pa partisipá den e proseso. Ku otro palabra, nan tabata kier a kambia WolBES i FinBES, sin konosementu di Konseho Insular i sin konosementu di pueblo. Ku esaki por bisa ku un era di 'ja meneer', a yega na su fin.

Elogio

Sin ke kita for di kontribushon di otronan, M21 ta felisitá su lider, Daisy Coffie, ku e trabou ku el a desplegó komo lider di delegashon di Boneiru i esun ku na

Hulanda a hiba palabra na nòmber di Boneiru. M21 ta sumamente satisfecho i a biba ku su lider i sa di e trabou ku el a hasi, no solamente komo representante di pueblo, òf bosero di e delegashon di Boneiru, pero tambe komo intermediadó pa tene e gruponan i islanan huntu i esaki den un ambiente agradabel pa por a traha ku otro i yega

na un bon resultado pa tur e islanan.

M21 ta gradisí Coffie, tur e otro miembronan di Konseho Insular, e miembronan di Kolegio Ehekutivo, tur e konseheronan i tur otro persona, pa nan kontribushon na e logro akí pa Boneiru. Amigu i enemigu, por bisa kiko ku nan ke, pero e logro akí ta un logro grandi. Prinsipal-

mente e echo ku porfin no a kore bai na amèn di Hulanda pa falta di kompromiso ku pueblo, òf pa simplemente flohera òf inkapasidat pa sali na vanguardia di pueblo. Di awor padilanti, Hulanda tin ku tene kuenta ku e tempu di 'ja meneer', e tempu di 'ja knikkers', a pasa i ku tin hende kapas ku ta dispuesto pa sali na vanguardia di pueblo.

Siudadano hostiná:

“Basta ku manchamentu nòmber di hende”

KRALENDIJK- “E polítikonan bieu i frustrá riba e isla aki mester stòp di mancha nòmber di hende”, un siudadano hostiná ta bisa BONERIANO. E ta referí na e artíkulo ku BONERIANO a publiká ku e título ‘Diputado i famia ta gosa den hotèl di 5 strea na Hulanda’. Den e artíkulo aki e polítiko Robby Beukenboom básikamente ta tilda gobernantenan di usa plaka di pueblo pa gosa di durante biahenan di trabou.

“Manera semper nòmber di Clark i Nina mester ta den boka di Robby. Awor e ke mustra dede riba otro? Mi konosé Robby basta tempu i sa tur e chochorianan ku el a hasi. El a lubidá kiko e tabata hasi? Drumí den kamber di hotèl di Nerry pero tuma sèn i hasi komo sifuera el a paga hotèl?”, e siudadano ta sigui su relato. “Ami no sa aserká reporteronan pero awor si

a yega ora pa mi skirbi den korant pasombra ta keda publiká kos di un banda so.

Mustra pueblo e dos banda di medaya”, e ta bisa. Segun e siudadano aki regularmente ta ataka personalmente e koalishon

aki ku e meta pa deskreditá nan.

“Nina sí a pone su ‘boarding-pass’ riba facebook. Bo por mira ku e a biaha ‘economy’. Mi ta reta Junny Wout di MPB pa mustra di dje.”



Automobil Express

ta buska

-2 elektro-mekaniko

Pa mas inf. # di telefón

700-8725

Fuga di petrolio dilanti Tobago a para despues di un luna

KRALENDIJK/ TABAGO -- E derame di petrolio a drenta tambe Laman Karibe, menasando Venezuela i e islanan Karibense serka di dje, inkluyendo Boneiru. E fuga di petrolio for di e lancha ku a kapseis dilanti kosta di Tobago a para, un komunikado di Ministerio di Energia di Trinidad i Tobago, a bisa.

E fuga di petrolio for di un lancha ku tabata karga te ku 35 mil barí di fuel oil ku a kapseis na komienso di febrüari dilanti di e isla Karibense di Tobago a keda pará, e gobièrnu di e islanan a bisa djaweps.

E derame, ku a mira pa promé biá dilanti di e kosta atlántiko di Tobago dia 2 di febrüari, a dañá parti

di e palunan di mangel di e isla i a menasá su sektor turístiko i peskero.

E kompartimentunan di e lancha for di unda e zeta tabata sali, awor ta yená ku awa di laman riba e punto di fuga efektivamente blòkiando e fluho adishonal di fuel oil, e ministerio a bisa.

E gobièrnu a kontratá kompania di reparashon i salbashon pa yuda limpia e derame i salba e lancha ku fuga. E volúmen di e derame, su orígen, destino previsto i doño di e lancha, ta keda desconosí.

Pero Trinidad a bisa ku e lancha ku tabata transportá fuel oil tabata di tou dor di un toubot ku no a keda lokalísá.

HUSTISIA



Polis ku atvertensia fuerte

No saka víktima di aksidente for di outo

KRALENDIJK -- Polis ta atvertí tur hende pa no bai purba saka víkteman di aksidente di tráfiiko for di outo. Si algu pasa ku e víktima esaki por tin konsekuensia serio pa bo. Djaluna 6 di mart, alrededor di 2.30 or di atardi, 'meldkamer' sentral a risibí notifikashon tokante un aksidente riba Kaminda Djabou. Un outo a dal den un palu di lus i seguidamente a dal den kurá di un kas. Dor di e impakto, e palu di lus a kai riba e outo.

Na yegada di patruya por a konstatá ku wayanan di koriente tabata kologá riba e outo. Pa motibu ku un pipa di awa tambe a kibra, awa tabata spùit riba e kabelnan di koriente.

Komo ku e situashon

no tabata seif pa tantu e víktima ku tabata den e vehíkulo ainda i tambe komo ku tabatin un kantidat di mirónes presente na e sitio, e agentenan a disidí pa hala tur hende for di den serkania di e sitio di e aksidente i sera esaki pa seguridad.

Na momentu ku e agentenan tabata atendé ku esaki, un grupo di mirónes a saka e víktima for di den e vehíkulo. E agentenan a atendé fuerte ku e personanan aki. Ambulans a transportá e víktima pa hòspital pa tratamentu médiko. Personal di WEB tambe a bini na e sitio pa kita koriente for di e palu di lus pa asina eliminá e peliger pa esnan presente.

Mas despues a resultá ku e víktima tabata pasahero

di e outo i ku e shofùr a bandoná e sitio. Despues di un investigashon pa sa kousa di e aksidente, a resultá ku tres outo tabata kore ku velosidat haltu tras di otro. Pa motibunan ainda desconosí, e shofùr di e último outo a pèrdè kòntrol i a okashoná e aksidente.

Kuerpo Polisial Hulanda Karibense ke hasi un apelashon an pueblo pa semper sigui òrdu di polis. Move un víktima òf mishi ku un víktima ku ku ta enbolbí den ki tipo di aksidente ku por ta, por tin konsekuensia fatal pa e víktima i konsekuensia hurídiko pa esun ku a hasi su mes kulpabel na esaki. Den kaso di un aksidente di tráfiiko, laga personal di ambulans òf brantwer, saka e víktima for di den outo.

But pa manehá imprudente

KRALENDIJK -- Riba djabièrnè 8 di mart, alrededor di 3.50 or di mardugá, un patruya a spòt un vehíkulo ku tabata kore ku velosidat haltu den direkshon nort riba Kaya Korona. Esaki tabata motibu pa e patruya a bai

tras di e vehíkulo. A sende e lusnan óptiko (zwaailicht) i señal di zonido pa para e shofùr. E shofùr tabata muestra un komportashon di manehá imprudente i tabata pasa diferente vehíkulo riba Kaya Korona. Debí na e velosidat haltu ku e shofùr

tabata manehá, e agentenan a disidí di stòp ku e persekushon riba Kaminda Tras di Montaña. Algun ratu despues a topa ku e vehíkulo i e shofùr na un adrès den Rincon. E shofùr a haña un but pa manehá di forma imprudente.

Ladronisia di outo

KRALENDIJK -- Riba djaweps 7 di mart a drenta keho di ladronisia di un Toyota Tercel koló blanku, ku plachi di number

B-4115. Entre 6'or di atardi riba djáron 6 di mart i 7'or di anochi riba djaweps 7 di mart, desconosínan

a bai ku e outo. E outo tabata stashoná dilanti di un kunuku na Kaminda México.

Ta investigando e kaso.

Detenshon pa insulto

KRALENDIJK -- Djaluna 6 di mart, alrededor di 7.30 or di anochi, a detené un mucha hòmber di inisial L.H.E.N. di 16 aña di edat pa insultá un ámtenar den funshon, pa intenshonalmente no

kumpli ku òrdu di polis i pa resistí kontra su detenshon.

Un agente polisial a mira dos mucha hòmber ku tabata kore baskel sin lus den 'centrumgebied' na Playa, i a bai atendé ku nan tokante esaki. Un di e

muchanan a insultá e agente i a sigui kore bai.

Despues di un persekushon kòrtiku, ku yudansa di mirónes, a para e sospechoso riba Kaya Jean B.F. Vitte na altura di un mini market i a detené.



Popularidat ta relativo
P'esei un propio estilo
No solamente pa ta eksitoso
Sino sigur mas balioso

BròKèS 93.5 FM

pokopoko pero sigur mas i mas hende ta ...



Skuch'e

Telefon/ WhatsApp +599 701 0935

www.radio935bonaire.com

Peña Traha Pa Bo B.V.

ta buska

-2 metselaar

Pa mas inf. # di telefón

+599 785-3119

Alida Francis definitivamente ta bira Gezaghebber di Statia

KRALENDIJK -- Alida Francis ta bira Gezaghebber di Sint Eustatius. Sekretario di Estado Alexandra van Huffelen di Relashonnan den Reino i Digitalisashon, apropon’é pa nombramentu den Konseho di Minister.

Alida Francis di 58 aña, a nase na Sint Eustatius i for di febrüari 2021 ta Komisario di Gobièrnu di Sint Eustatius i na 2020 e tabata Komisario di Gobièrnu remplasante.

Promé ku tur esaki e tabata traha entre otro komo konsehero di komunikashon senior i bosero na Rijksdienst Caribisch Nederland i tabata direktor di turismo di e teritorio insular di Sint Eustatius.

Francis a studia periodismo na skol di periodismo na Tilburg. E nombramentu ta drehta na vigor riba e fecha ku e dekreto Real fase 3.0 di ‘Wet herstel voorzieningen Sint

Eustatius’, drehta na vigor.

Riba e mesun dia akí, e intervenshon atministrativo na Sint Eustatius ta terminá. Esaki ta nifiká fin di e término di Komisario di Gobièrnu remplasante tambe.

Nombramentu di e gezaghebber ta marka e regreso definitivo di e demokrasia riba e isla desde e momentu di e intervenshon na 2018. Esaki ta nifiká ku for di e

momentuei, Sint Eustatius di Reino interino tin mes ta responsabel algun mandato adishonal pa e ehekushon di e tareanan atministrativo. kaduká, entrante promé Ademas, Representante di sèptèmber 2024.



Programanan di Bonaire.tv

TELBO kanal 70
Flamingo TV kanal 23

Djasabra 9 Mart 2024

12.00 Herensia:	Nort'i Saliña (kas pa kas) 16
13.00 Aki Boneiru:	Luna Yen
15.00 BAPA:	Henry Tore
16.00 Herensia:	Nos Kosecha
17.00 Aki Boneiru:	Raymunda Martis
18.00 Herensia:	Bernard Ben Laken
19.00 BAPA:	Feliciano Da Silva Piloto i Vita Frans
20.00 Aktualidat:	Suzy Thodé
21.00 Aki Boneiru:	Segni Bernardina
22.00 Herensia:	Museo Kanta Orkidia (Dolfi & Chemi)
23.00 BAPA:	Ria - Rosemarie Heitkonig

Djadumingu 10 Mart 2024

12.00 Herensia:	Hyacintha i Hyacintho Martinus
13.00 Dokumental:	Ex Trahadonan Di spritzer & Furhman ta Reünie
15.30 Puerto Latino:	Luis Zárraga
16.00 Herensia:	Nort'i Saliña (kas pa kas) 16
17.00 Aki Boneiru:	Luna Yen
19.00 BAPA:	Henry Tore
20.00 Herensia:	Nos Kosecha
21.00 Aki Boneiru:	Raymunda Martis
22.00 Herensia:	Bernard Ben Laken
23.00 BAPA:	Feliciano Da Silva Piloto i Vita Frans

LÁGRIMANAN SKONDÍ

Skritura: Isaías 53:4-5

“Siguramente E mes a karga nos enfermedatnan, i El a karga nos tristesa; ... i pa medio di Su heridanan nos ta kurá.” Isaías 53:4-5(BS)

Den bida tin diferente susesonan ku a kousa nos doló. Bo por ta bibando trankil ma na sierto momento e eksperensia òf trouma ei ta bin ariba. Bo ta bira iritá, preokupá i ta rabia lihé. Bo sa ku ta algu di pasado ma sierto temporada e ta bolbe presentá.

Ta pasobra bo no a dil kuné na e manera korekto. Isaías 53:4a ta bisa nos ku Hesus a karga tur nos tristesanan. Bo a yega di duna Hesus e trouma i e doló ei? Pa bo laga lòs i avansá liber?

Troumanan por ta kousá pa: divorsio, abuso seksual, físiko emoshonal i verbal, morto di un ser kerí, aksidente, ofensanan, i falta di pordoná un persona ku bo tin na pechu ... i muchu mas.

E dolónan ei ta kompañá ku hopi emoshonnan; dolónan emoshonal. P.e. rabia, odio, disgustu, amargura, soledat, sinti inferior, frustrashon, miedu, duele propio, bèrgwensa ... etc. Semper tin hende envolví, pasobra ta hende ta kousa nos doló emoshonal. Por ta nos: mayornan, mama, tata, ruman, yu, maestro di skol, amigu/a, esposo ... etc.

Kon abo ta dil ku bo dolónan? Tin amargura den bo kurason? Tin rabia den bo kurason? Rabia kontra e persona ku a hasí bo doló? Òf asta bo ta rabiá ku Dios pa loke a pasa ku bo? Pa Dios no tin lágrima skondí, pasobra E ta mira bo lágrimanan i ta seka nan. Isaías 53:4 ta bisa ku El a karga nos tristesanan. Papia kunÉ, Sklama na djÉ, E ta kla pa yuda bo.

Kòrda, Hesus a karga bo tristesanan p’esei abo no mester karga nan.

Miralda Paula-Frans

Produkshon PGM

TCB na bolsa di ITB na Berlin

KRALENDIJK -- Tourism Corporation Bonaire (TCB) a partisipá di 5 pa 7 di mart na e bolsa internashonal di turismo, ITB, na Berlin, Alemania, e bolsa B2B mas grandi di Europa, den kolaborashon ku Ofisina Hulandes pa Turismo i Kongreso, NBTC. Miles Mercera, Direktor di TCB i Marjolein Oleana, Business Manager i Europe Liaison, a duna guia na Boneiru su representashon na e bolsa di ITB.

Na aña 2023, TCB i NBTC a drenta den un laso di kolaborashon, kaminda TCB ta haña oportunidat pa kolaborashon riba

vários tereno ku NBTC. Boneiru su partisipashon na diferente bolsa ta forma un parti integral dentro di e kolaborashon ku NBTC.

Durante e bolsa, e tim di TCB a establese kontaktonan intensivo ku potensial operadónan nobo di tour di Alemania i otro partidonan importante den e industria di biahe di abla Aleman. E meta tabata pa sigui promové i posishoná Boneiru riba e merkado Aleman i realisá kolaborashonnan nobo pa nos isla.

TCB a pone komo meta pa enfoká mas ainda riba e merkadonan Aleman, Austriako i Suiso, konosí

komo e merkado GAS. Mas aleu, e enfoke ta riba promoshon di Boneiru dentro di e merkadonan akí i atraé mas bishitante for di e regionnan akí.

E bolsa di ITB tabata un éksito grandi pa nos tim. Yen di konfiansa nos ta inisiá kolaborashonnan nobo pa hasi Boneiru mas fuerte na Alemania i su paisnan bisiña,” segun Miles Mercera, Direktor di TCB. E tim di TCB ta wak bèk riba un bolsa di ITB sumamente eksitoso i ta desidido pa drenta den kolaborashonnan nobo, ku lo pone Boneiru den un forma mas fuerte ainda riba mapa dentro di e merkadonan di abla Aleman.



A aktualisá método pa kalkulá alimentashon pa yu

KRALENDIJK -- Desde 2022 ta hasi uso di un modelo nobo di kalkulashon pa determiná alimentashon pa yu a base di kua Voogdijraad Hulanda Karibense ta konsehá Korte.

Anualmente ta aktualisá e modelo di kalkulashon akí. E aña akí kambio den suèldu mínimo, kompensashon pa yu i kosto di bida ta afektá e modelo nobo. Pa determiná altura di e alimentashon pa yu, Voogdijraad CN ta apliká un modelo di kalkulashon. Den e modelo di kalkulashon akí ta determiná promé kapasidat finansiero di e mayornan i nesesidat di e yu(nan), basá riba standartnan insular i investigashon di mínimo sosial.

Basá riba ámbos resultado i un korekshon pa kompensashon pa yu, ta determiná e alimentashon pa yu pa ámbos mayor. Despues ta wak kuantu

dia e yu ta keda serka e tata òf mama i ta kalkulá e suma di alimentashon final.

E modelo mester keda aktualisá pa e tin balor pa hustisia. Pa e motibu aki ta hasi anualmente un evaluashon di e modelo. Ku tur e kambionan den e sumanan standart pa por ehèmpel suèldu i kompensashon pa yu i e investigashon resien di e mínimo sosial na Hulanda Karibense, a aktualisá tambe e montantenan ku ta na vigor entrante promé di yanüari 2024 den e modelo di kalkulashon di alimentashon pa yu.

Kalkulashon di nobo

Petishon pa un kalkulashon nobo di un suma di alimentashon konsedé kaba ta solamente posibel, si tin motibu bálido pa hasi esei.

Pues ku e situashon di e mucha, e persona ku tin derecho riba alimentashon òf e persona ku mester paga alimentashon mester a kambia strukturalmente, pa

por pidi un kalkulashon nobo.

Asina por ehèmpel retiro, kambio di trabou i entrada, òf un kambio den konstelashon di un famia òf lugá di estadia prinsipal di e yu por ta motibu pa hasi petishon pa un kalkulashon nobo. Pa esaki mester entregá prueba tambe.

Entregá un petishon pa motibu ku un persona ku ta obligá di paga alimentashon kier paga ménos no ta sufisiente pa pidi un kalkulashon nobo.

Mas informashon

Por haña mas informashon tokante petishon di alimentashon pa yu i e modelo di kalkulashon di alimentashon pa yu riba e wèpsait www.rijksdienstcn.com.

Pa petishon di alimentashon pa yu òf kalkulashon nobo mayornan por akudí serka Voogdijraad CN riba e isla na unda e yu ta inskribí.

Tene nos playanan limpi



Pa forsa i salú:

Misa pa Tirzo Cicilia

KRALENDIJK- Djaweps 7 di mart famia, amigunan i konosínan di Tirzo Cicilia a bini huntu den Misa di La Birgen Coromoto na Antriol pa hasi orashon pa e siudadano aki. A orá pa salu di nan ser kerí, i misa tabata yen. E potrètnan ta duna un impreshon.



Pushi bon kuidá

KRALENDIJK- Lesadónan di BONERIANO ta keda kapta imágennan di personanan ku ta duna pushi di mondi kuminda. Riba Seru Largu un persona a duna 10 pushi di mondi kuminda den parti mainta.



Azein Much'i Antriol

KRALENDIJK- Elbert Bartolomeo Winklaar ta un persona markante. Mayoria hende konosé Elbert bou di e nòmber Azein i por mir'e kana regularmente

den Antriol. Azein tabata un bon futbolista i ainda un gran fanátiko di futbòl. Awor su hòbi ta lesamentu i e ta sigui desaroyo di futbòl internashonal.



OPTENIBEL NA

Kuranderia popular

Ofisina di FuHiKuBo

Ofisina di Extra

Del Mar BV

\$17.50

Natural i spiritual

Un proyekto di Unesco i FuHiKuBo



Di tur un tiki



Último tempu embolbiendo mas hende den e kaminatanan riba djadumingu mainta. For di e último dos kursonan di historia i kultura ku FuHiKuBo a

duna a sali un grupo di masoménos 14 persona ku tin gana di kana i siña mas di Boneiru. I mi t'ei pa kompartí loke mi sa, asta loke mi no sa. Último dos djadumingunan nos a kana Ruta Wayaká i tambe un ruta den área di Lagun i Washikemba. Pa e djadumingunan benidero lo nos keda ei banda. Ta kaminatanan ku no ta masha largu.

Manera mi a splika, mi deseo ta pa kompartí i kompartí informashon di historia, kultura i naturalesa pa medio di e kaminatanan aki. Nan ta habrí pa tur hende partisipá.

Wayaká

Mi a bai Ruta Wayaká dos siman pasá. Di e grupo grandi sinembargo ta tres hende so a reakshoná. Joselito, Anneke ku mi mes. No Anneke 'camera-

woman' di FuHiKuBo, sino otro Anneke.

Mi ta kere ku e motibu prinsipal ku e reakshon tabata asina pover tin di aber ku e ruta aki no ta fásil. I nos a bai e ruta kompletu. E ta pisá. Pero e ta bunita. Mi ta kan'é fásil, pasobra mi ta kere ku mi a kan'é hopi biá kaba i konosé e distansia i otro kondishonnan ku mester tene cuenta kuné.

Nos a sal tempran. Pa 5.50 nos tabata na kaminda kaba den skuridat. Mester a usa lus di nos telefònnan solar pa lusa kaminda. E dia ei tabatin fòlman. Nos a mira bahada di luna pabou i salida di solo pariba. Bunita ekspektákulo.

Anneke, abogado, tin bon kondishon. For di kombersashonnan kuné mi a bin komprondé ku

último tempu e ta kanando hopi den naturalesa.

Piedra marká

Kada bes ku mi kana Ruta Wayaká, anke m'a kan'é alrededor di 20 biá kaba, si no ta mas asta, mi ta topa ku kos nobo. Nunka bo ta ripará tur kos ku tin a lo largo di e kaminata aki.

Durante e kaminata di dos siman pasá nos a topa ku algun piedra interesante. Nan ta 'marká, meskos ku e krus den piedra na Nort di Saliña, ku den pasado tabata un sitio sagrado di deboshon pa katólikonan. Un fenómeno geológiko.

Durante e kaminata di Ruta Wayaká nos a topa ku mas kanadó, indikashon ku e ruta aki ta birando mas i mas popular.



Washikemba

E segundo kaminata ku e grupo aki, djadumingu



último, tabata den besindario di Lagun i Washikemba. Nos a ripará tambe kuantu daño e derame di petrolio banda di Trinidad a kousa na tantu Lagun komo Washikemba.

Mi a splika esnan den e grupo e importansia ku Lagun den pasado pa bonerianonan. Entre otro pa piskamentu. Tokante Yakito Pop ku tabata kue turtuga den

reda. Tambe komo sitio na unda kunukeronan di den besindario tabata wak si laman no a trese artíkulonnan di uso, manera palu, tera.

Tambe nan sa piki koko ku tabata drif subi kosta. Nan tabata usa e kokonan aki pa traha zeta. Nos a hasi kos ‘leuk’ tambe, esta un

kompetensia pa buska djuku. E ganadó a resultá Imka. M’a regal’é komo premio e buki di Kuifje na Papiamentu titulé ‘E Asuntu di Florisol’.



Tene nos playanan limpi

extra
...number 1
www.extraboneiru.com

Skuadron 13 di Asalto ku ehersisio

K R A L E N D I J K / W I L L E M S T A D -- Último simannan e di 13 Skuadron di Asalto, konsistiendo di masomenos 100 marinir, a hasi ehersisio na Kòrsou. Esaki nan a hasi huntu ku e kursistanan di instruktur di tiru di kombate.


Pa motibu di e kombinashon di edukashon i formashon, e pelotònnan por a funshoná di un forma optimal den nan abilidadnan. Durante e treinen 13 marinir a pasa kapasitashon komo instruktur di tiru di kombate.

E énfasis di e ehersisio di e di 13 RSQN a konsentrá su mes riba ehersisionan di tiru “Live Fire”, den kua nan a praktiká tur e sistemanan di arma disponibel pa e unidad.

Esakinan ta mas ku 10 tipo di arma.

E ehersisio a kuminsá riba un eskala abou i finalmente a desaroyá te alkansá e nivel di skuadron di mas ku 10 marinir.

E militarnan di Kòrsou tambe tabata envolví na e ehersisio i a duna nan sosten kaminda tabata nesesario.





NILO Trankilo

Awe, NiloTrankilo, tal bai bèk ku abo lesadó den e temporada despues ku el a kaba su estudio di ingeniero di Aviashon i Ekonomia Industrial. El a traha for di aña 1987 te ku aña 1995 na e kompania antiano di aviashon ALM komo Manager di Engineering i Dokumentashon.

E promé dia di trabou di NiloTrankilo na ALM tabata 9 di mart 1987, pues riba e fecha aki, eksaktamente 37 aña pasá. Durante e añanan ei, NiloTrankilo a siña hopi kos i a haña hopi eksperensia den e mundu di aviashon. Tambe NiloTrankilo a biaha hopi mes ku ALM, tantu pa trabou komo pa plaser i tambe a pasa hopi kos prèt den e temporada ei. Awe NiloTrankilo ta bai konta bo poko di e kosnan prèt, den kua el a pasa.

Na aña 1983 ora ku NiloTrankilo a bin hasi su aña práktiko na ALM, durante su estudio di Vliegtuigbouwkunde di HTS, el a laga un hopi bon impreshon atras serka e Hefe di Mantenshon di e tempu ei Theo Kort (q.e.p.d).

Dor di esei ora ku NiloTrankilo a terminá su estudionan, el a haña trabou mesora na ALM komo



Algun empleado di ALM ta brinda dilanti e avion djèt MD-82 huntu ku presidente Kitland Chong.

Manager di Engineering i Dokumentashon.

Rekuerdo

Poko dia ei, den un grupo di 'WhatsApp' di èks-trahadónan di ALM, ku amigu Ro Coffie a inisiá, un di e èks-koleganan a pone un potrèt di ALM ku vários empleado i e presidente komisario di e tempu ei Kitland Chong (q.e.p.d) ariba den un akshon publisitario pa ALM.

Mirando e potrèt ei, el a trese hopi rekuerdo serka NiloTrankilo. Riba e potrèt tambe NiloTrankilo a mira un GWK, esta un Grond Werktuigkundige, Carlucho Legrand (q.e.p.d), ku tabata un bon amigu di NiloTrankilo.

E potrèt di LeGrand aki, a pone NiloTrankilo rekordá dos kos hopi prèt ku el a pasa huntu ku LeGrand ku e avion Fairchild Hiller FH-227B. ALM tabatin dos di nan, esta PJ-FHA i PJ-FHB.

Komo Manager di Engineering NiloTrankilo a biaha hopi pa trabou pa ALM.

Ora ku e avionnan djèt di tipo MD-82 mester a haña nan chekeo di mantenimentu grandi na Viena, Oustria, NiloTrankilo tabata esun ku tabata biaha bai, komo e representante di ALM durante e inspekshon ku tabata dura sigur 3-4 siman pa avion, pa supervisá i tuma desishon pa ALM na e sitio.

Dianan prèt na ALM (1)

ALM

Awor ata aki e promé kos chistoso. A pasa un biaha ku ALM no por a paga na tempu p'e mantenshon hasí na e avion, pa esaki por a sali di e lugá di mantenshon i bula bèk for di Oustria pa Kòrsou. Tur dia e empleadonan di e kompania oustriako tabata pasa den kantina i puntra NiloTrankilo komo representante di ALM, NiloTrankilo: "What about the payment from ALM." Pues kon ta pará ku e pago di ALM p'e trabou hasí.

Ei mes nan ta bira bati riba skouder di NiloTrankilo i nan ta bisa mi un poko sarkástiko òf chistoso: "ALM means Always Late Money".

NiloTrankilo no por a hasi nada otro, ku tabata di hari huntu ku nan, pa no a yora atrobe. Tabata di guli manda'bou, òf hari manera un kunukero ku doló di djente.

Pikèt

Awor ta bai sigui un otro kos prèt. NiloTrankilo, trahando na ALM Technische Dienst, tabatin un warda di pikèt di un siman pa kada un ku ta hefe di departamentu òf staf na Technische Dienst. Si tabatin kualke problema di gran importansia durante bo warda, e GWK di turno ta yama pa informá bo.

NiloTrankilo ta kòrda ku un di e biahnan ku e tabatin warda di pikèt, ku un di e avionnan Fairchild Hiller FH-227b (mira potrèt), sea ta PJ-FHA òf PJ-FHB, tabatin un problema ku e motor na banda drechi.

Ladron?

E tempu ku NiloTrankilo tabata traha na ALM, e tabata hür un kas den e barrio di Buenabista, huntu ku su ruman Hildo, kende

tambe ta un ingeniero, pero un akadémiko, esta un Ir. Werktuigbouwkunde.

Riba un djasabra mardugá grandi banda di 3'or, ku un di e avionnan Fairchild Hiller FH227B tabata tin problema ku un motor, e GWK Carlucho LeGrand a yama riba telefòn di kas, pensando ku e ta haña NiloTrankilo na liña. Awó e telefòn di kas ta poné anochi den kamber di Hildo i Hildo a bula lanta for di soño tur turdí òf tolondrá i kue e telefòn ora ku LeGrand a yama.

Hildo di: "Halo, awóraki ta mardugá, ora di drumi. Ta ken bo ta pa yama e ora di marduga aki?"

N'e otro banda di e telefòn e GWK Carlucho LeGrand ta kontestá: "Ta ku LeGrand, bo ta na kas?" Keriendo ku ta ku NiloTrankilo e ta papiando.

Hildo na su turno ta puntr'é: "Ken bo di bo ta? Un Ladron? Ahn? Mi n' tende bo bon? Un ladron?"

Den su 'turdí-heid' di soño ei, e 'Legrand' a zona meskos ku 'ladron' den Hildo su orea.

Esta baina no!? Mientrastantu Hildo a sigui murmurá na bos haltu, di moda ku LeGrand a tende Hildo bisa mi: "Awó sí a kaba. Ata un ladron ta bèl, chèk ku si tin hende na kas aki." Den tur esei, Legrand a logra bisa Hildo: "Nò nò, n' ta ladron no, ta LeGrand di ALM." E ora ei Hildo a bin komprondé e asuntu. Ku ta NiloTrankilo LeGrand mester, i a pasa NiloTrankilo e telefòn. Ta ko'i grita hari e kos ei.

Den e siguiente entrega di NiloTrankilo djasabra otro siman den BONERIANO, mi ta bai kònta kon nos a atendé problema ku e avion. Keda pendiente! Ta sigui otro siman.



E avion di ALM e tempu aya, un Fairchild Hiller FH-227B, pará na aeropuerto Flamingo di Boneiru.

SANTANA TA BISA HOPI

E grafnan ku tin den un sementerio òf santana ta relatá hopi historia di un pueblo. Tras di kada kèlder òf grafkèlder tin un historia òf un storia, dependé kon bo mira òf interpret'é. Den un seri di artíkulo BONERIANO ta pone atenshon na último lugá di sosiegu di nos hendenan.

E palu ku no a sigui krese

E kèlder di famia Jozef Hart ta situá te pariba den santana, un tiki mas pa nort di loke ántes tabata e porta prinsipal di santana, pero ku awor no ta den uso mas. E ta keda pegá ku e sekshon di santana ku nan tabata dera mucha, anguelitu, ántes. Nan tabata yama e sekshon aki Lima, Limba òf Limbo.

E famia Hart na kua ta referí aki ta Jozef Philippus Thomas Hart, (Papa) Chèfi, ku tabata kasá ku Maria Wilhelmina Josefa Hart-Booi, kariñosamente yamá (Ma) Michi. Famianan Hart i Booi, tambe Rijna, semper tabatin hopi relashon ku otro. Hopi bes miembronan di e famia aki tabata kasa ku otro.

Chèfi tabata un komersiante konosí na Boneiru na fin di siglo 19 i den prinsipio di siglo pasá. Su yu hòmbenan tabata Jose Lucas Hart (Djòs), Cornelis (Nechi) Hart i Ricardo Hart. Di

nan, na final ta solamente José Hart a keda Boneiru pa manehá e negoshi aki. Ta kalkulá ku a funda Firma Hart Sons na 1919. E yunan muhé di Papa Chèfi i Mai Michi tambe tabatin akshon (minoritario) den Jozef Hart Sons.

Den e kèlder en kestion ta reposá e restunan di vários miembro di famia Hart, anke no ta tur nan nòmber ta aparesé riba e diferente plakatan ku tin. Ademas tin e yunan di Chèfi i Ma Michi ku a muri na otro lugá, manera Ricardo i Nechi Hart, ku a muri na respektivamente Kòrsou i Aruba.

Un di e último personanan derá den e kèlder aki tabata Margaritha Angela Hart, Shon Ita, kende a muri dia 27 di sèptèmber 1973. E tambe tabata yu di Chèfi i Ma Michi.

Otro persona ku nan a dera den e kèlder di famia Hart tabata Cecilia C. Hart-Nicolaas, kende tabata e promé kasá di

Ricardo Hart. Ricardo mes tambe su restunan ta den e kèlder aki.

Kisas e detaye di mas interesante di e kèlder di famia Hart ta e imágen di un dama ku tin riba dje. Un mdama muhé yòn pará na un palu kòrtá. Un palu pues ku no a sigui krese.

E imágen aki ta representá Angelina Dominica Hart-Rijna, kende a muri na edat di solamente 27 aña. E persona aki tabata e promé kasá di Nechi Hart. E echo ku el a muri na un edat yòn asina, a pone ku e famianan kier a aksentuá esaki di tal forma. E palu ta representá e bida di Angelina, ku no a haña chèns di krese bira grandi.

Na e kèlder aki, refiriendo na Angelina, tin skirbí na ingles: 'To all I hold most dear to the very dear memory. – Of – My beloved wife Angelina Dominica Hart who died 10 october 1926 in the age of 27 years. If love could save thou hadst not

died'. Despues di tempu Nechi Hart a bai biba na Aruba, kaminda el a bolbe kasa. Su desendientenan ta bibá tambe na Aruba. Nechi Hart tabata un


komersiante importante na Aruba i e tabata den e grupo di promé komersiantenan ku a lanta Kámara di Komèrsio di Aruba.



MONCHI & TONCHI

Mi ta aploudí e famia ku tin monopolio di webu

Awèl sí, nan ta bende webu pero tambe primi webu



KOLOFÓN

Editor: Bonaire Communication Services N.V.
Kaya Irlanda 12,
Tel. 717-8482
Redakshon: extrabon@gmail.com
aviso: avisobon@gmail.com
Wèpsait: www.extraboneiru.com
Facebook: Extra Boneiru

Direktor
Shirley Martis
785-3824
796-3824

Hefe di redakshon
Nathaly
Evertsz-Ipcendencia

Redakshon
Papi Antoin
Edson Pietersz
Ibi Piar (deporte)

Partner na Aruba
Awe Mainta
Partner na Kòrsou
Extra
Partner na Boneiru
Live99

Layout
Maya Beaumont

Konsehero:
Bòl Antoin
786-6818

Aviso
avisobon@gmail.com

E envidioso no komprendé e matemátika di Dios i ke imponé esnan di dje: Papa

Pa Jorge Reyes

Envidia ta un piká kapital ku ta atentá direktamente kontra Dios, pues esun ku ta sufri no ta komprendé su plannan i ke imponé esnan di dje pasobra e no asepta e éksito ku otronan ta logra, Papa Francisco a sigurá .

Durante e Oudiensia General di 28 de febrüari 2024, Papa Francisco a kalifiká e **piká di envidia komo un di e vicios kapital mas antiguo** ekspresá den Sagrada Skritura, den spesífiko ora e ta señalá ku odio di Kaín pa ku Abel el a lòs di momento den kua el a realisá ku e sakrifisio- nan di e ruman ta agradá Dios.

“Kaín tabata e primogénito di Adán i Eva, a haña e parti mas konsiderabel di e herensia paterno; sin embargo, ta suficiente ku Abel, e ruman hòmer mas chikí, tin éksito den un inisiativa chikí, p’asina ku Kaín a bira sobrio”, re- kordá Papa Francisco na papia tokante **referensia di e piká di envidia den Tèstament Bieu.**

Kua ta e aktitutnan di es- nan ku ta biba e piká di envid- ia?

Den e katekésis ku prepará Papa Francisco pa kontinuá su reflekshonnan tokante bisionan i virtutnan, i ku a ser les’ é dor di señor Filippo Ciampanelli,

ofisial di e Sekretaria di Es- tado, a referí na e **aktitutnan ku e personanan ei ta mus- tra ku a kai den e retnan di demoño** di e piká di en- vidia.

1. E kasa di esun envidio- so semper ta tristu.

2. E ta mantené e mirada abou, e ta parse ta konstante- mente eksaminando suela, pero en realidat e no mira nada.

3. Su mente ta enbolbí den pensamentunan yen di mal- dat.

4. Envidia, si no ta ser kon- trolá, e ta kondusí na odio di e otro.

“Den su base tin un relas- hon di odio i amor: un perso- na ke malu pa e otro, pero den sekreto e ta desena ser manera e. E otro ta e mani- festashon di lo ku nos lo ta, i ku den realidat nos no ta. Su suerte nos ta parse un inhus- tisia: seguramente –nos ta pensa- nos **meresé nos mu- chu mas su éksitonan òf su bon suerte!**”, suprayá e Papa na referí su mes na e piká di envidia.

E envidioso no ta asepta ku Dios tin su propio matemátika: Francisco

Despues di suprayá ku e pika di envidia ku un malu ku a ser studia no únikamente den e ámbito kristian, sino ku a atraé atenshon di filósofo- nan i sabínan di tur kultura, Papa Francisco a apuntá kue **e envidioso tin un falsu idea di Dios** i ke imponé su lógika egoista.

“Den e rais di e bisio e tin e falsu idea di Dios: e no ta asepta ku Dios tin su propio ‘matemátika’, distinto di nos... **Nos lo ke imponé Dios nos lógika egoista,** pero e lógika di Dios ta amor. E biennan ku E ta duna nos ta destiná na ser kompartí”, afirmá Papa den su katekésis tokante envidia les’ é den e Oula Pablo VI.

Saliendo di e parabel di Hesus aserka di e obreronan dor di e doño pa bai na e hòfi di wendruif na distinto oran- an di dia, e Santo Tata, esnan di promé ora ta kere tin dere- cho a un salario mas altu ku esnan ku a yega na último, pero e doño a duna tur e me-



sun pago i ta bisa: “Mi no tin derecho pa disponé di mi bien- nan ta parse mi òf **ta ku mi gen- erosidat ta bai na provoká bo envidia?**”.

“Ta pesei San Pablo a sup- liká e kristiannan: ‘Stima kor-

dialmente un na otro; **ku kada kua ta stima otro mas ku bo mes**’. Aki tin e remedi kontra envidia!”, a sigurá Papa Francisco na referí na e manera de kon por kontrarestá e piká kapital akí.

Bienaventuransanan di Kuaresma (kontra un kurason di piedra)

Felis ta esnan ku ta **rekoré e kaminda di kuaresma ku un sonrisa riba kara** i ta sinti ku for di nan kurason ta brota un sentimentu di alegría inkontenibel.

Felis ta esnan ku durante e tempu di Kuaresma, i den nan bida diario, **ta praktiká e ayuno di konsumismo, di e pro- gramanan robes di televishon, di e kritikanan i di indife- rensia.**

Felis ta esnan ku ta purba den bida diario bai **suavisando nan kurason di piedra**, pa duna paso na sensibilidat, ternu- ra, kompashon i indignashon pintá di proposishonnan.

Felis ta esnan ku **ta kere den pordon**, den tur ámbito, e ta un di e as sentral den ponementu den práktika di e Evangelio di Hesus, pa haña un mundu rekonsiliá.

Felis ta esnan ku **ta aisla na mes di tantu sonido i infor- mashon rápido**, i ta traha un espasio den e desierto di nan kurason p’asina i ku e silencio ta transformá esaki den soledat sonoro.

Felis ta esnan ku **kòrda e promesa di nan bon Tata i Mama di Dios**, kende ta renobá kada momento di nan alian- sa di serkania i presensia alentador pa ku henter e género hu- mano.

Felis ta esnan ku **será porta pa agresornan, pa e triste- sa i desepshon**, i ta habri tur bentananan di nan kas pa e solo di ilushon, di enkanto, di beyesa i di solidaridat.

Felis ta esnan ku ta **usa nan mannan, nan mente i nan pianan na servisio gososo di otronan**, kende mas ayá di tur krisis, ta mantené nan mes, ta ofresé i ta praktiká speransa di resurekshon na tur esnan inválido, marginá i oprímí di mundu. E ora ei si ku lo a brota e flor di Pasku di Resurekshon na final di un kaminda gososo di kuaresma.

Dies mensahe pa e alma

1. Resa no ta manera un tayer di resèrve ku bo ta usa únikamente ora bo ta den problema, mas bien e ta manera e guia ku ta dirigí bo riba e kaminda korek- to di e kaminda di bida.
2. Bo sa dikon e winshil di outo ta asina grandi i e spil di wak patras ta asina chikí? Pasobra nos pasado no ta asina importante manera nos futuro. Mira padil- lanti i sigui den movimentu.
3. Amistat ta manera un buki, e ta tuma algun sekònde pa e kima pero ta tuma vários aña pa skirbié.
4. Tur kos den bida ta temporario. Si nan ta bai bon, disfrutá di nan, pasobra nan no ta pa semper. Si nan ta bai malu no preokupá bo pasobra nan no por dura demasiado tampoko.
5. Amigunan bieu ta manera oro. Amigunan nobo ta manera djamanta. Si bo tin djamanta no lubidá riba e oro, pasobra pa sostené un djamanta semper bo mester di un base di oro.
6. Segun bo ta pèrdè speransa i pensa ku esaki ta e final, Dios ta hari for di ariba i ta bisa: “Relahá bo, mi yu, esaki ta djis un bògt, no e final di e kaminda.”
7. Ora Dios ta resolvé bo problemanan abo tin fe den djE. Ora Dios no ta resolvé bo problemanan E tin fe den bo abilidadan pa resolvé nan.
8. Un siegu a puntra San Antonio: Kiko por ta pió ku pèrdè e bista? El a kontest’é: “Ku bo pèrdè bo vis- hon di kosnan.”
9. Ora bo ta resa pa otronan, Dios ta skucha bo i ta bendishoná nan i algun bia ora bo ta sigur i felis, kòrda ku un persona a resa p’abo.
10. Preokupá bo mes no ta hiba e problemanan di mañan leu, e ta bai ku e pas di awe.

Lider di AVP, mr. Mike Eman ta preocupa:

Crecemento espantoso den cifra di fayecimento na Aruba

ORANJESTAD -- Den un entrevista realisa pafo di Censo, lider di Partido di Pueblo Arubano AVP, mr. Mike Eman a splica di un tendencia preocupante den nos poblacion cu ta un crecemento espantoso den e cantidad di fayecimento na Aruba. E asina yama cifra di “oversterfte” ta alarmante, segun mr. Mike Eman.

Riba su red social tambe Eman a comparti e cifranan aki. E ta papia di un cifra preocupante di perdida di

nos sernan keri cu mester di un investigacion rapido. CBS ta indica cu na 2022 tabata tin 879 fayecido na Aruba. CBS: “Compared to the pre-COVID period, 879 deaths represent thus an increase of 22.3 percent”. Esaki ta un aumento espantoso compara cu e añanan prome cu Covid (Pre-Covid).

Eman ta relata e “oversterfte” na “uitgestelde zorg” durante COVID, na falta di atencion medico, stress y abandono

den nos comunidad. E ta accentua cu e aumento espantoso aki mester wordo investiga. CBS ta muestra cu durante e periodo 2022 Aruba a registra un asina yama ‘oversterfte’, cu ta nifica un cantidad mas halto di fayecimento compara cu e periodo prome cu Covid. Ta trata di 22.3% mas cu e promedio di 719 morto pa aña.

Mientras durante pandemia a registra casi 1000 morto, a spera cu pa 2022 y 2023, e cantidad lo

a baha considerablemente; sinembargo esey no ta e caso Hulanda tambe a registra un oversterfte di 5% cual tabata suficiente pa gobierno y parlamento duna ordo pa haci un investigacion.

Esaki a saca afo cu un factor ta: ‘uitgestelde behandelings’ cu ta relata na e posponemento di asistencia, testmento y tratamiento medico door di pandemia. “A pospone hopi test y tratamiento di curason y/of cancer y awo

ta mira e resultado di esey,” asina Eman a declara, indicando cu tin otro factor cu e investigacion a señala y esey ta stress. E preocupacionnan aki ta afecta grandi y esunnan vulnerabel di un manera mas fuerte y tin un retraso pa haya asistencia for di especialista. “Esaki ta poniendo persona na peligro di perde nan bida y nos no ta compronde dicon den Cocolishi no a bati un alarma,” e lider di AVP a cuestiona.

En conexion cu e materianan Historia y Papiamento

Minister Maduro tabata invitado na Colegio San Antonio

ORANJESTAD -- Diamars mainta Minister di Finansa y Cultura, Xiomara Maduro, tabata presente como invitado na Colegio San Antonio pa hunto cu representante di Parlamento y di Ministerio Publico, duna un charla tocante Trias Politica como parti di e materianan di Historia y

Papiamento.


Aruba su estado di derecho ta basa riba e Trias Politica na unda cu tin un division entre e poder di legislacion den man di Parlamento, e poder di ley den man di Ministerio Publico y e poder di ehecurion den man di Gobierno. Durante e mainta

aki, Minister Maduro, como parti di e poder di ehecurion, a elabora riba e trabounan cu ta wordo haci pa e Ministernan cu ta lidera e trabounan di diferente departamento den Gobierno di Aruba.

E alumnonan a haya e oportunidad pa haci e mandatario diferente pregunta tocante su funcion y tambe con esaki ta bay den practica pa cu e Trias Politica.

Minister Maduro ta

gradici Colegio San Antonio su director, docenten y specialmente e alumnonan pa e bunita recepcion, e dialogo interesante y ta deseanan hopi exito cu nan proyecto pa e materianan di Historia y Papiamento.



KÒRSOU

Siman Nashonal dediká na arte den skol

WILLEMSTAD -- Ministerio di Enseñansa, Siensia, Kultura i Deporte (ESKD), ta informá ku e siman di 1 pa 8 mart ta e Siman Nashonal dediká na arte den skolnan di Kòrsou. Den e kuadro akí, Minister ESKD, Sithree van Heydoorn, a aprobá pa mucha i hóbenan bishitá un ruta di tayer i galerianan di artistanan lokal pa asina mucha i hóben por sera konosí ku nan i keda inspirá pa nan arte. Den e siman akí, skolnan ta dediká atenshon pa alumnonan siña tokante di tur aspekto di arte i ta stimulá alumnonan pa nan mes deskubrí nan talento di arte den skolnan. E sektor di kultura i deporte ku ta enkargá ku e proyekto akí, a hasi e petishon na tur skol pa stimulá kreativitat den skolnan i dediká e siman akí na arte. E motibu indiká den e dekreto ta, arte ta fungi komo instrumento pa un edukashon mas kompletu i un desaroyo



sano di nos muchanan, arte ta nesesario i indispensabel den skolnan, komo ku esaki ta aportá entre otro na formashon i desaroyo kreativo di nos muchanan i ta un vehíkulo importante pa sostené edukashon serka nos muchanan. Pa motivá alumnonan, e aña akí Sektor di Kultura i Deporte ta kolaborá ku e iniciativa 'Open Atelier Route', organisá pa artista visual Avantia Damberg, ku ta un evento ku ta aksesibel pa tur hende por sera konosí ku artistanan lokal na un manera agradabel. Sektor di Kultura i Deporte ta hasi e evento aksesibel pa un

grupo di mucha i hóben pa medio di kordiná e bishita di e grupo akí i tambe fasilitá skolnan den serkania di e ruta, transporte pa asina



nan por bishitá galeria, òf tayer di artistanan lokal.

Durante di e dia akí, tantu mucha i hóben, ta bai bishitá artistanan lokal kaminda nan ta mira e trabou di e artista, pero tambe ta haña e oportunidat pa tende un tiki mas tokante e artista i su arte. Sektor di Kultura i Deporte ta kontentu di mira desaroyonan positivo pa loke ta trata arte den skol. Un ehèmpel di esaki ta e iniciativa di estudiante artista visual, David Paulus, kende

ta studia pa bira dosente di arte na Fontys School of Arts, na Hulanda. Durante di e algun siman, David a organisá i implementá diferente tayer rònt di e tema di abolishon di sklabilitut i arte den skolnan. Alumnonan di entre otro Kolegio Pierre Lauffer VSBO i Maria Immaculata Lyceum, a forma parti di e tayer akí, kaminda arte ta keda kreá usando materialnan desechabel. Esaki ta demonstrá ku no tin mester di hopi pa alumnonan por aktivá nan kreativitat. Sektor di Kultura i Deporte, na nòmber di Gobièrnu di Kòrsou, ta yama un danki na kada skol ku a i ta partisipá den e proyekto di siman di arte den skol.

Studentenan ta profundisá den remodelashon duradero di Waterfort Plaza

WILLEMSTAD – Un grupo di 35 estudiante di segundo aña di e fakultat di siensia sosial i ekonómiko di Universidat di Kòrsou, a atkirí un perspektiva úniko riba desaroyo urbano sostenibel dor di partisipá na un tour bèrdè, organisá pa e programa SustainaBUL di e fundashon HUB Caribbean 2030.

Durante e tour akí, ku a tuma lugá dia 1 di mart, E remodelashon di Waterfort Plaza tabata fundamental, ku un enfoke fuerte riba e aspektonan ambiental, sosial i ekonómiko.

E tour a kuminsá den sala di eksibishon di Waterfort Plaza, kaminda e studentenan a haña nan promé impreshon di e proyekto ambisioso via di makèt. Despues nan a eksplorá e edifisio Plaza i e arkonan históriko rònt di dje, pa haña un idea di e retonan i oportunidatnan ku e remodelashon ta presentá.

E kurason di e tour tabata e énfasis riba sostenibel, konsiderando e tripel resultado final di hende, e

planeta i ganashi. Esaki ta enserá buska métodonan sostenibel pa demolí e strukturanan eksistente, prestando atenshon spesial na e metanan di desaroyo sostenibel, e asina yamá SDG.

Esaki ta inkluí buska siudatnan i komunitatnan sostenibel, konsumo i produkshon responsabel i asosiasion pa logra metanan. Ekspertonan di e empresa di konstrukshon

MNO i APC Real Estate, a kompartí ku e studentenan nan konosementu tékniko i konosementu tokante e kadena mas amplio di e proyekto.

E edishon universitario di tour bèrdè 2024, a keda proklamá komo un eksperensia inmersivo pa un profesor di UoC, kende a duna e studentenan un kompreshon profundo di loke desaroyo urbano sostenibel real ta impliká.



STATIA/SABA/ST. MAARTEN

Saba a partisipá na foro teritorionan ultra mar

THE BOTTOM -- Durante e siman di 26 pa 29 di febrüari, Diputado Leviton Heyliger i asesor polítiko i punto vokal di UE, Courtney Hassell, a biaha pa Bruselas pa asistí na foro di teritorionan ultra mas di Union Europeo. E foro ta tuma lugá tur aña i ta e instansia di diálogo di nivel mas haltu ku ta reuní representantenan di e teritorionan ultra mas, e estadonan miembro i Komishon Europeo, na nivel polítiko.

Promé ku e foro, e delegashon di Saba a

reuní ku e direkshon general di asosashonnan internashonal, pa analisá e progreso di e programanan ku ta andando ku ta finansiá ku fondonan di Union Europeo. Un di e programanan aki ta e programa indikativo teritorial plurianual, MIP, ku ta finansiá energia sostenibel i resiliente na Saba i lo kontribuí na e implementashon di e di tres fase di energia renovabel.

E delegashon a partisipá tambe na workshopnan tokante e posibilidatnan di koperashon regional i

interregional i a asistí na e konferensia ministerial di e asosashon di paisnan i teritorionan ultra mar, OCTA. E di 13 foro tabata representá durante e konferensia ministerial, kaminda a diskutí i adoptá entre otro e kurso stratégiko nobo di OCTA. E foro mes a tuma lugá dia 29 di febrüari. Durante e dia a tene vários diskurso di apertura i deklarashon polítiko riba diferente tópiko, manera asosashonnan i integrashon regional, partisipashon hubenil i kultura. Diputado Heyliger tabatin e oportunidat pa papia riba e tema di kultura. Durante su diskurso, el a papia di e inaugurashon di e departamento di kultura nobo ku ta trahando pa preservá e diferente patrimonionan kultural di

Saba i inkulká e orguyo di Saba entre e residentenan.

Ademas di esaki, Heyliger a papia di e vishon di kultura na Saba i e importansia di preservá i selebrá nos identidat. E diskurso a konkluí afirmando ku Saba ansiosamente ta spera futuro kolaborashonnan i oportunidatnan di finansiamentu ku por surgi via di e foro. OTC tambe tabatin e oportunidat pa interkambiá ku Jutta Urpilainen, Komisario Europeo di Asosashonnan Internashonal, den seshonnan trilateral. E OTC Hulandes, huntu ku representante di e estadonan miembro, Alexandra van Huffelen i e enviado spesial pa finansiamentu di Union Europeo, Edison Rijna, a tene un reunion produktivo

den kua a diskutí diferente tópiko, entre otro inkluyendo e importansia di invertí den hóbennan, tin aksesu mas fásil na fondo, inisiativanan di energia renobabel i e sosten duná dor di e ofisina di enviado.

Diputado Heyliger a deklará ku e tabata un siman eksitoso di reunion. Saba su partisipashon na e foro ta demostrá nos dedikashon firme pa mehora e asosashon stratégiko entre Union Europeo i nos isla komo pais i teritorio ultra mar. Pa medio di diálogo konstruktivo i kompromiso, nos ta fomentando kolaborashonnan significativo i trahando pa haña aksesu na mas oportunidatnan di finansiamentu ku lo impulsá Saba pa kresementu i prosperidat kontinuo.

Kandidatonan di URSM ta ekspresá nan malkontentu ku liderazgo

PHILIPSBURG -- Por lo ménos ocho kandidato ku a presentá riba e lista di URSM, a ekspresá nan malkontentu ku e lider, Dr. Luc Mercelina i e desishonnan ku el a tuma ora di manda nòmber di persona pa e puesto di Minister i personal di Gabinete. SMN News ta komprondé ku 11 di e 19 kandidato ku tabata lista di URSM, a uni pa ekspresá nan malkontentu, sin embargo tres di e kandidato ta aktualmente for di e isla i no por a firma e karta.

Algun di e kandidato a bisa SMN News ku nan a manda un karta pa Mercelina djamars, firmá pa ocho di e diesun kandidatonan ku a postulá riba e lista di URSM pa e elekshonnan Parlamentario di yanüari 2024. Nan a bisa ku nan ta preokupá ku Mercelina, kende tambe ta kandidata pa Promé Minister, a opta pa nombra Veronica Jensen-Webster komo kandidato pa Minister pa e ministerio di VSA, miéntras ku tin kandidato mas kualifiká riba e lista ku tambe a optené mas voto ku Jensen-Webster.

URSM a preselekschoná su kandidatonan promé ku

a permití nan kandidatura riba e lista di USM. “E kansion e tempu ei tabata diferente. Sí nan a bisa nos ku nan no lo a permití nos atministrá e pais, anto nos lo a uni ku e otro partidonan polítiko ku tambe a pidi nos pa ta parti di nan lista.”

E kandidatonan tambe ta rabiá, pasobra a bisa nan Stuart Johnson lo keda nombrá komo Hefe di Gabinete di Promé Minister, miéntras ku Mercelina tin plan pa instalá Hensley Plantijn, kende a keda destituí di su puesto pa Promé Minister Silveria Jacobs. Un otro persona ku a keda nombrá komo Hefe di Gabinete, ta Chris Weaver, pa e ministerio di VSA. E kandidatonan a bisa ku awor ta bisa nan ku nan mester presentá na trabou, miéntras ku algun persona ku ni sikiera a partisipá na e elekshon ta otorgá puesto den e dos ministerionan ku URSM lo tin. Nan a bisa ku nan a duna Mercelina dos biá 24 ora pa kontestá e karta di preokupashon i stòp ku e sita.

E kandidatonan a bisa ku e lider di RSM a hasi vários promesa na nan ora el a reklutá nan pa presentá riba e lista di URSM i nan ta sinti ku a gaña nan.

Kuerpo Polisial a evaluá operashon durante Regata

PHILIPSBURG -- Kuerpo Polisial di Sint Maarten (KPSM), a konvoká un reunion di reflekshoná djamars 5 di mart, pa evaluá su funshonamentu durante e evento Regata 2024. E reunion akí tabata pa evaluá e efektividat di e strategianan i e resultado general di e esfuersonan pa garantisá siguridat i órden públiko durante e evento significativo akí.

KPSM ta ekstendé su agradecimentu na tur e partnernan, partikularmente na Polis Franses i VKS, pa nan kontribushon i apoyo

durante henter e fin di siman di Regata. E esfuersonan di kolaborashon di tur esnan envolví, a hunga un ròl fundamental pa mantené seguridat i fasilidat un ehekushon lihé di e evento.

Despues di un evaluashon ekstenso, e kuerpo ta kontentu di anunsiá ku Regata 2024 a terminá sin insidente. E esfuersonan diligente di e kuerpo pa manehá situashonnan di tránsito i mantené órden públiko, tabata fundamental pa logra e resultado remarkabel akí.

Ademas, KPSM ta gradisí e organisadónan di Regata 2024, pa nan enfoke

proaktivo pa mehorá e seguridat general di e evento.

Su koperashon i su kompromiso pa implementá medidanan di seguridat, a kontribuí significativamente na e éksito general di Regata.

Reflekshonando riba logronan di Regata 2024, KPSM ta reafirmá su kompromiso pa garantisá siguridat i bienestar di e komunidad i ta keda dediká na promové asosashonnan, implementá strategianan efektivu i mantené e standardnan di ekselensia mas haltu den aplikashon di lei.



DEPORTE

Eksitoso klínika di basketbòl

KRALENDIJK -- Federashon di Basketbòl di Boneiru, en koperashon ku Bònt di Basketbòl Hulandes i INDEBON, a konklui ku éksito un wikènt di klínika intensivo di basketbòl ku meta pa mehorá abilitat di entrenadó i stimulá kresementu di basketbòl na Boneiru.

E evento, ku a tuma lugá di 23 pa 25 febrüari, a konta ku presensia di hopi entrenadó i hungadó entusiasma. E ophetivo prinsipal di e klínikanan akí ta pa brindá formashon sertifiká na entrenadónan di basketbòl na Boneiru.

Un total di 17 entrenadó dediká, a kompletá e programa di sertifikashon, ekipando nan ku abilitatnan esensial i konosementu pa sigui desaroyá talento di basketbòl riba e isla.

“Nos ta hopi kontentu ku éksito di e klínikanan di wikènt i nos ta gradisí tur partisipante, entrenadó i organisashonnan, ku a partisipá,” Windmarc White, presidente di Federashon di Basketbòl Boneiru, a bisa. E kompromiso i pashon ku kada un a mustrá, ta suprayá nos kompromiso konhunto pa kresementu i desaroyo di basketbòl den nos komunitat.

E kolaborashon entre Federashon di Basketbòl Boneiru, Bònt di Basketbòl Hulandes i INDEBON, ta reflehá un vishon kompartí pa promové e deporte di basketbòl i brindá oportunidatnan balioso pa atletanan i entrenadónan aspirante na Boneiru. Dor di inisiativanan manera e klínikanan akí, e

organisashonnan ta pèrkurá pa kultivá un kultura vibrante di basketbòl i kapasidat individuonan pa yega na nan potensial kompleto riba tereno. Nos ta laga un gratitut na e entrenadónan ku a kompletá nan sertifikashon i awor ta ekipá ku e hèrmèntnan pa guia i inspirá e siguiente generashon di hungadó di basketbòl, representante di Bònt di Basketbòl Hulandes, a bisa. Nan kompromiso pa sigui siña i desaroyá, ta esensial pa impulsá e deporte pa dilanti na Boneiru.

INDEBON, komo un partner importante den e inisiativanan akí, a brindá sosten i rekursonan krusial pa sigurá éksito di e klínikanan. Nan partisipashon ta suprayá e importansiadikolaborashon entre organisashonnan deportivo i instansianan gubernamental, pa promové ekselensia deportivo i envolvimentu komunitario.

Miéntas e klínikanan ta terminá, Federashon di Basketbòl Boneiru, Bònt di Basketbòl Hulandes i INDEBON, ta reafirmá nan kompromiso pa fomentá un komunitat di basketbòl vibrante na Boneiru. E abilitatnan atkerí i relashonnan kultivá durante e evento akí, lo sirbi komo un katalisadó pa kresementu i éksito futuro den e deporte.



Jong Bonaire Fun Walk 2024

KRALENDIJK -- Fundashon Jeugdwerk Jong Bonaire ta informá ku e tremendo Fun Walk ta tuma lugá e aña akí dia fecha 7 di aprel.

Jong Bonaire ta konosí pa basta aña komo un sentro pa hóben bishitá despues di skol, ofresiendó diferente aktividat ku ta balansá entre rekreashon i edukashon. Tur aña e fundashon ta organisá diferente evento pa rekoudá fondo.

Fun Walk ta un evento organisá pa motivá e

pueblo di Boneiru pa move mas i ta konsiente di nan salú.

Un tremendo evento kaminda abo so òf abo ku bo grupo di famia i amigu, kolega, klup di deporte, por partisipá na dje.

E aña akí pa medio di QR code tur ku ta deseá di partisipá, por scan esaki riba e poster i asina inskribí online. Di antemano Fundashon Jeugdwerk Jong Bonaire ke gradisí tur ku lo koperá di un òf otro forma pa ku e evento akí.

7 APRIL 2024
START AT 5:00AM
ADULTS \$15 KIDS \$6
INCLUDES: TSHIRTS
WATER BOTTLE, DRINKS
SANDWICH & FRUITS
WALKING ROUTES
10, 15 & 20KM
BIKE ROUTE 37KM
START & FINISH @ JONG BONAIRE
REGISTRATION & SHIRT PICK UP
MARCH 6 TH 14:00 - 18:00
MARCH 7 TH FROM 05:00
@JONG BONAIRE

13TH JONG BONAIRE

FUN WALK & BIKE

CACTUS ACCOUNTING SERVICES

BONEIRU - Antes i awor

Teksto | Fotografia: Bòi Antoin

Na luna di mei 1936 e promé oroplanu a aterisá na Boneiru. Tabata un oroplanu di KLM West-Indisch Bedrijf. Promé, dia 9 di mei, Oriol, a baha. Fin di luna di mei a sigui Snip. Asina historia di aviashon komersial a kuminsá na Boneiru. E promé pista di aterisahe tabata na Subí Blanku. Ainda e fundeshi di e promé edifisio di stashon t'ei. Pero e paisahe a kambia totalmente, manera e dos fotonan aki ta musta.



Tene nos playanan limpi

èxtra
...number 1

www.extraboneiru.com

JBL Bluetooth Speaker

\$139

Nintendo Switch Smash Bros Bundle

\$475

JBL Wireless Earbuds

\$79

CityShop
Smart shopping ▶ Better living

Shop with confidence, we got the best warranty and support.

30
ANIVERSARIO

VIDAA
It's all about U

NETFLIX YouTube prime video VUDU YouTube TV fuboTV

pluto xumo NOW Kids HaystackTV FITE

Hisense • VIDAA 4K ULTRA

43" Hisense 4K Smart TV

\$309
SPECIAL PRICE